

DISSERTATIO INAUGVRALIS MEDICA
DE
MEDICAMENTIS
OPIATIS OFFICI-
NALIBVS

QVAM
PRÆSIDE

D. IOANNE HENRICO SCHVLZE

MEDICINÆ ELOQVENTIÆ ANTIQVITATVM ET
PHILOSOPHIÆ PROFESSORE PVBLICO
ORDINARIO

ACADEMIÆ CÆSAREÆ NATVRÆ CVRIOSORVM ET
REGIÆ SOCIETATIS SCIENTIARVM BERO-
LINENSIS SODALE

PRO GRADV DOCTORIS

a. d. MAIL. M DCC XXXV.

PVBlice DEFENDET
IOANN CASPAR ISAAC

GÖRLICENSIS.

HALÆ MAGDEBVRGICAE

Typis JO. CHRIST. HILLIGERI, Acad. Typogr.

MINISTRI V. R. V. O. M. N. I. S.

MINISTRI, GENEROSUS, V. M. N. I. S.

STANNO DOMINO

GEORGIO ERNESTO

A GERSDORF

DYNASTIE DE REICHENBACH, OBENDORF, OELICH
ET ERG. KRANICH

SARRENSIMM AC POTENTISSIMI

REGES POLON ET ELIC. SAXON. CAMERARIO ET CON-
SILIARIO NEC NON CURIA PROVINCIAR. DUCALIS
COROLICIS PRASIDI ATQUE DISCRETE
TIMENTISSIMO

NEC NON

VIRI IUSTI AC GENTILISSIMO DOMINO

D O M I N O

HANS CHRISTOPH

GOTTLOB

A WARRISDORF

HEREDITARIO DOMINO DE LAVCHITZ AC

SARRENSIMO AC POTENTISSIMO REGI ET ELECTORI
SAXONIE & CATHOLICI

V I R O

*ILLVSTRI, GENEROSISSIMO, MAXIMEQVE
STRENVO DOMINO*

D O M I N O

GEORGIO ERNESTO
A GERSDORF

DYNASTÆ IN REICHENBACH, OBERDORFF, OELISCH
ET GROS-KRANSCHÉ &c.

SERENISSIMI AC POTENTISSIMI

REGIS POLON. ET ELECT. SAXON. CAMERARIO ET CON-
SILIARIO NEC NON CVRIÆ PROVINCIALIS DVCATVS
GORLICENSIS PRÆSDI ATQVE DIOECETÆ
EMINENTISSIMO &c.

NEC NON

VIRO ILLVSTRI AC GENEROSISSIMO DOMINO

D O M I N O

HANS CHRISTOPH
GOTTLOB
A WARNSDORF

HÆREDITARIO DOMINO IN TAVCHRITZ &c.

*SERENISSIMO AC POTENTISSIMO REGI ET ELECTORI
SAXONIÆ à CONSILIIS*

VT ET

V I R O

ILLVSTRI AC GENEROSISSIMO DOMINO

D O M I N O

HANS GOTTLOB

A GABLENZ

HÆREDITARIO DOMINO IN *Hendersdorff* &c.

*SERENISSIMO AC POTENTISSIMO REGI ET ELECTORI
SAXONIAE a CONSILIIS*

IN LVSATIÆ SVPERIORIS CIRCVLO GORLICENSI PROCE-
RIBVS PROVINCIALIBVS SPLENDIDISSIMIS DOMINIS SVIS
MAECENATIBVS, PATRONIS GRATIOSISSIMIS
MAXIMEQVE COLENDIS,

HOC QVICQVID EST SPECIMINIS
INAVGVRALIS,

IN DEBITAE REVERENTIAE SYMBOLVM

PIA MANV

DEVOTO ANIMO

SACRVM ESSE IVBET

JOHANNES CASPARVS ISAAC.

MEDICAMENTIS OPIATIS OFFICINALIBVS.

PROOEMIUM.



Medicamenta deorum manus esse ab Herophilo dictum commemoratur. Id intelligendum esse de bonis medicamentis, iisdemque recte & perite adhibitis, nemo dubitauerit. Certissimum est, nihil, quod magnas vires habet, inueniri posse, quod non vehementer nocere idem queat in manu imperiti & temerarii medici, aut talis hominis, qui quam non didicit artem in suo vel aliorum corpore exercere audet. Multa sunt a veteribus & recentioribus inuenta, quæ præclare iuant, quando cum omnibus conditionibus, quas rectus usus requirit, exhibentur: quorum non pauca videmus hodie iacere, contemni & vituperari.

rari ab illis, qui forte numquam cogitarunt de recto adhibendi modo addiscendo, ut, si omnino experiri ipsi talia nolint, iudicium tamen ferre de iisdem valeant, utrum illi, qui adhibent, recte dextreque, an sinistre & præpostere, in usu illorum versentur. Equidem existimo multa in officinis exstare complurium sæculorum experientia dudum comprobata medicamenta, quæ mansura etiam esse diu post nostram ætatem, & eclipsin forte quidem passura subinde, sed pristinum iubar recuperatura semper auguror. Non is sum, qui vel omnia veterum inuenta approbem & laudem, vel recentiorum diligentiam præ veteribus contemnam. Scio esse inter illa complura, quæ emendari possint: & ab his proposita & inuenta esse, quæ omnis grata posteritas mirabitur & cum debita grati animi significatione commendabit. Omni itaque modo demerendi & colendi sunt, qui ad genus humanum a morbis & doloribus liberandum contulerunt, quicquid ipsis innotuit, nullaque invidia se impediri passi sunt a beneficio tam bene recteque collocando. Enimuero & illi aliqua habenda fuerit gratia, qui iam in humani generis commune bonum collata recensere & vel præstantiam vel defectus eorum perpendere, rectum

rectum vero & securum vsum pro viribus ostendere allaborauerit. Elegimus itaque nunc medicamenta opiate, quæ in officinis nostris publica auctoritate prostant, & in *Dispensatorio Regio & Electorali Porusso-Brandenburgico* describuntur. Curam atque studium ea mereri, nemo vel dubitauerit vel negauerit, qui, quanta circumspectione opiate offerenda sint, ex communibus medicinæ præceptis addidicerit. Nostrium hic non putauimus nos immiscere litibus opio passim intentatis, quod tanto minus requiri hic existimauimus, quocertius scimus non opium absolute damnatum esse, aut opiate repudiata fuisse, sed temerarium & imprudentem vsum, quem & ipsimet toto animo abhorremus, dissuademus, damnamus. Id vero dabimus operam, vt medicamenti cuiusuis quasi oeconomiam, quidque in illo vel pulcrum, admirabile & commodum sit, vel minus congruum & laudabile videatur; quodnam altero tutius aut periculosius sit, & quomodo errores & nocendi pericula evitari debeant, quis demum vsus nobis cognitus sit, candide & sincere, vt oportet in re ad totius humani generis commoda pertinente, proponamus. DEVM *Φιλάνθρωπον* veneramur, velit nos in omnem & solam dirigere veritatem,

§. I.

AD rem festinantes in verbis non morabimur explicandis. Opiatum medicamentum dicimus, cuius compositionem opium, omnibus medicis notissimum, ingreditur. Excludimus itaque illam notionem pharmaceuticam, qua opiata vocantur certæ compositiones, quæ consistentiam eam habent, quæ ad theriacæ vel mithridatii modulum accedit, quibus tamen electuarius nomen tribuere non placuit, quia non nacta sunt illam conseruarum quantitatem, quæ ex magistrorum formulas præscribendi legibus requiritur. Quando officinalium disertam mentionem adiicimus, facimus id studio lectorem beneuolum admonendi, ne arcana Eleusinia hic quærat, aut magistrales præscriptiones, aut denique quicquid priuato nonnullorum studio & ausu hic vel illic forte in vsum vocatum fuit: de quibus omnibus, utpote non publice notis, non iniicietur vlla mentio,

§. II.

In ipso limine admonemus etiam, nos multa de opio heic omisisse, quæ in celeberrimi & excellentissimi viri D.D. CASP. NEVMANNI, Consiliarii & Profess. Regii, *prælectionibus de opio* leguntur, quas cum cura & studio legendas utique commendamus, quo facto tanto maiorem profectum in hac doctrinæ parte licebit consequi. Quumque ibi de compositis officinalibus nihil ex instituto actum sit: officinalia autem opiata, præter paucissima, de quibus nos tacebimus, composita sint, in quæ crudum opium recipiendum est, aut quæ recipiunt compositi-

positiones, quas crudum opium ingressum fuit: apparet in quo differat nostra opera, ab opere viri laudati laudatissimo.

§. III.

Quo vero felicius progrediamur, assumemus, tamquam scholæ medicæ confessum & indubium dogma, opium esse medicamentum valde celeris & magnæ virtutis, quam motus imminuendo & sensus obtundendo exserit, vsque adeo, vt si homo adultus, non aduersus, genuini opii vel vnicum granum assumat, in somnum feratur: si maiori copia hauriatur, lethargum accersat, & aliquibus lethiferum fiat. Vnde factum est, vt in catalogum venenorum sollemniter relatum fuerit, ob tristes effectus, qui consequenti sunt, si a temerariis aut malitiosis hominibus datum fuit sine illis cautelis, quas rectus vsus requirit. Hæc res effecit vt omni tempore fuerint, qui requirerent naturam huius succi, & a quo pendeat tam præsens effectus: vt illo cognito inuenirent, quid vel addendum ipsi vel demendum sit, quo mitius securiusque reddatur remedium.

§. IV.

Solebant autem, vt omnibus, qui veteres tractauerunt, cognitum est, ex qualitatibus manifestis philosophari, & vel humidum vel siccum, frigidum vel calidum excessiuum accusare. Opium itaque plerique declarabant in quarto gradu, id est ad excessum vsque, frigidum: quamquam aliqui caliditatem in ipso animaduertisse volebant, ceterisque acre bellum propterea inferebant. Sed nos immiscere isti concertationi, si forte vtriusque partis patroni alicubi supersunt, minime volumus, qui huius rei non alio

sine meminimus, nisi vt examinare & diiudicare possimus, quas rationes quisque auctor veterum medicinarum habuerit, cur hæc vel illa opio corrigendo admiscuerit. Nam qui frigidam naturam causabantur, calida adiciebant: qui calidam, debebant vtique illis potissimum fidere, quæ frigida esse rebantur. Enimvero veterum plerique a frigidis stabant partibus: recentiores demum aliqui, ne illorum accessio viderentur, calorem accusabant.

§. V.

Exposcit nunc res ipsa, ut paucis dicamus, quid frigidum iudicauerint veteres, quid calidum, quasque vtriusque notas proposuerint. Quicquid igitur calorem, vel in vniuerso corpore, vel in eius particula, excitat, ruboremque aut inflammationem inducit, quicquid motum intendit, excretionem vllam proritat, vel gustum aut olfactum sensibilem in modum afficit, aut sensationem doloremue excitat, id annumeratur calidis. Si quid vero contrarias his operationes edit, calorem moderatur, excretiones minuit vel suppressit, ruborem auferit, inflammationes coercet, sensum nullo modo ferit, aut stuporem illis inducit, frigidis accensetur. Ex quo apparet, quod propter sequentia adducendum fuit, veteres purgantia, vomitoria, diaphoretica, alexipharmaca habuisse omnia calida, eodemque aromata retulisse omnia, cum sapidis, præsertim dulcibus & acriusculis, tantoque magis acribus, itemque odoratis; atque ab his, si frigidis adiiciantur, correctionem excessiuarum qualitatum expectauisse.

§. VI.

Quamquam vero nostro æuo quatuor illas qualitates,

tes, cum elementis Empedocleis & Aristotelicis, subtilius tornatas & multis modis modulisque transfusas & transformatas, incedere videmus; inter tot tamen medici dogmatis metamorphoses stat antiquitas firma, multaque confessæ rei, vt cum PLINIO loquamur, documenta seruat. Scilicet accepimus, quæ in officinis fulgent, & practicis, non abreptis nouarum rerum cæca admiratione, placent, aut pro exemplo seruiunt vel certe seruiuerunt, maiori ingenio feliciter excogitatæ compositiones, quibus laudem suam nemo æquus arbiter auferre cupit, si rei summam spectet, & non in minutiis inique tricetur. Superest itaque vt per has, ordine temporum, quantum coniecturæ locus est, eundo, artem perspicere, & vsum ostendere aggrediamur conatu, vtinam responsuro euentu.

§. VII.

Inter compositiones officinales, quæ opium recipiunt, antiquissimam existimo illam, quæ a PHILONE TARSENSE nomen *philonium*, Φιλώνιον, accepit. Testem pro me adduco GALENVN de comp. phar. sec. loc. lib. IX. cap. 4. vbi hæc ferme, inquit, prima antidotorum dolores sedantium celebris facta est. Iuxta hanc autem aliis partim ad ipsam appositis, partim detractis, aut ponderibus mutatis, posterī magnum antidotorum dolores sedantium numerum fecerunt, quas etiam colicas vocant, denominatione ab affectione, quæ maximos dolores habet, deducta. Descriptio auctoris differt ab ea, quæ in nostrarum officinarum normis legitur, pridemque interpolationem eam Romæ cœpisse facile liceret ostendere, si id esset necessarium. Neque vllō nomine reprehendo factam adiectionem, sed potius

laude eam esse dignam existimo. Sed videamus illius omnem oeconomiam.

§. VIII.

Tota compositio, vt præscripta est, conficit drachmas LXXXVI. Ex his sunt LXIV. drachmæ mellis: ceteram quantitatem conficiunt pulueres immiscendi. Basin hic facit opium, cuius dr. ll. cum dimidia ponuntur, ipsi conspirat semen hyoscyami albi, cuius dr. V. accedunt. Atque ab his, nisi narcoticus & somnum inducens, effectus alius sperari vix potest. Iam si ponamus in opio dando vltra granum vnum non licere sine periculo progredi, & feminis hyoscyami albi dosin securam vltra scrupulum vnum non debere extendi: cognoscimus in vniuersum esse CLXV. doses, quæ adulto possint sine periculo offerri. Ita si ponamus calculum, inueniemus drachmam dimidiam esse dosin iustam, quam sine idonea ratione excedere non licebit, infra eam autem subsistere sæpe erit consultissimum. Sed age inspiciamus, quid accesserit vt corrigatur opium ac hyoscyamus, vt minus quam si sola essent, extimescenda sint.

§. IX.

Adiectum videmus primo quidem euphorbium, substantiam gummeo resinofam acerrimam, cuius vis irritans in virtute ptarmica fere incompscibili manifeste elucet, prorsus vt in hoc sit elleboro albo superior: virtus autem purgans est tam conspicua, vt practici aliqui non audeant adhibere, quidam in hydropicis grana V. permittant. Ponitur autem euphorbii drachma vnica, quæ doses satis magnas, ad purgandum quippe hydropicum sufficientes, duodecim continent, & in impedienda opii virtute narcotica non parum valent. Iam si, quod

quod ab experientia edocti nunc adsumimus, dimidium iustæ doseos alicuius purgantis, vni grano opii adiectum, efficit vt nec opium narcosin exferat, nec purgans aliquid moueat; intelligitur iam XXIV. opii granis suum adiectum esse antagonistam, a quo coerceantur ne nimium possint agere. Et quum hydropicis maiores purgantium doses offerantur; non nimium vtique postulamus, si contendimus vnam illam euphorbii drachmam XXX. opii granis, id est quintæ parti totius quantitatis, in ordinem redigendæ & compescendæ sufficere.

§. X.

Accedit deinde piper album, cuius dupla, ad opium, adest quantitas. Piper sale acri fixo multo scatere, quem in humores demittere valet, docet decoctio, quæ acerrima euadit. Ob hanc acrimoniam calidum a veteribus iudicabatur: neque id omnino negatum ibimus: quum destillationi subiectum largiatur oleum æthereum. Sed multa tamen sunt minus, quam piper, acria, quæ tamen maiorem calorem concitant. In affectibus ventriculi & intestinorum frigidis tria plerumque grana credimus sufficere: idque videntur veteres sequuti, qui in pluribus compositionibus, quæ iam apud nos exfulant, duo grana piperis vni grano opii, tamquam antagonistam, opposuerunt: scilicet non omnino oppressuri eius naturam virtutem, sed continuo vellicans pigrum socium adiecturi, ne nimium stertat & obdormiat. Iam autem, considerato quid euphorbium valeat, & additis viribus piperis, fere æquas motum compescendi & eundem resuscitandi vires agnoscemus in hac compositione. Accedunt acria aromatica, vt pyrethrum, nardus Indica & Zedoaria, sed tam exigua quantitate vt eorum cuius

vix amplius vno opii grano domandum permittere auderem. Paulo plus myrrhæ tribuendum videtur, cuius integra drachma ponitur. Cassiæ lignæ, cinnamomo, dauco, fœniculo & petroselino Macedonico, carminatiuis & oleo æthereo præditis, parum tribuere hic licebit, quoniam nimis exigua est quantitas singulorum: videnturque adiecta, vt medicamentum ad intestina seorsim specificent, eodemque deducant: quod & GALENVS aperte asserit.

§. XI.

Excipiuntur, vt dictum est, omnia mellis triplo Mixta confermentant, quo facto opii vis narcotica exaltatur. Id probe cognouerunt antiqui, qui de omnibus huius generis antidotis nos admonent, ne demus alicui, nisi sex, ad minimum, mensium ætatem adeptas, Seorsim destinabant veteres hanc PHILONIS antidotum passioni colicæ a causa frigida, tum vero etiam doloribus a calculo, spleneticis, orthophoeis, pleuritidis, sanguinem eiectantibus, tussientibus, singultientibus, vt apud GALENVN *l. c.* videre licet. Sed de conditionibus, quibus ad hæc talia venire liceat, & de cautelis adhibendis, hic non est ample differendi locus. BRICIUS BAVDERONVS in *pharmacop. p. 105.* ita iudicat: *Hoc Philonium similes obtinet vires illis, quas laudanum spagiricorum ab eis celebratum, vt eo carere possis.* Irascor viro ob hoc iudicium. Quid enim est in laudano opiato, quod vllum ingenium prodat? quid est, quod opii narcoticam vim corrigat, vt reddatur blande & innoxie sedatiuum? Pretiosiora adiecta video, sed supervacua, & ad summam rei nihil omnino valentia. Est talis comparatio, ac si quis Vlyssen cum Thersite contendere velit.

§. XII.

§. XII.

Paucis subiungemus ex Philonio Romano ortum, quod dicitur, *Perficum*. Basis est huic eadem, quæ & illi: corrigitur piperis pari modo, sed euphorbii minor, & tantum dimidia est quantitas. Sed croci maius est pondus, scilicet ad opium quantitas media. Accedit castorii modicum, cum aliquibus adstringentibus. Per MESVEN illud nobis transmissum est, qui cum succo plantaginis dandum præcipit hæmoptysi laborantibus. Luxatam hic compagem quereretur, ob euphorbium minutum, nisi crocus damnum refarciret. Magis autem miror illos, quibus demto plane euphorbio imbellem medicamentum optare visum fuit, cum quibus nunquam ego quidem fecero.

§. XIII.

Transeo ad *theriacam Andromachi*, cuius oeconomiam & structuram paucis reddemus perspicuam. Vingtī libræ medicæ huius theriacæ, ad præscriptum Regii & electoralis dispensatorii paratæ, continent opii tres vncias, quæ conficiunt grana cccc xxx. Ad-dita autem sunt opio, quæ τὸ εἰσάγωγον, (HIPPOCRAT. de diet. II. §. IV) id est pigram eius & motus figentem indolem, excitando corrigant, haud parca manu, sed satis proportionata quantitate, non pauca, quæ ordine videbimus. Primum est pulpa scillæ, cuius vnciæ sex ponuntur, ut iam quoduis opii granum a scillæ duobus granis corrigatur. Accedit piperis longi par opio quantitas; piperis autem albi & nigri drachmæ duodecim succenturiantur, quæ est medium illius ponderis, quo opium fuit assumptum. Consequitur ad quodvis opii granum piperis esse granum vnum & dimidium.

Piper

Piper quid faciat, vidimus antea: cur longum hic maiori quantitate ponatur, edocet DIOSCORIDES II. cap. 189. *Est porro, inquit, longum intensa mordacitate præditum & subamarum, quoniam immaturum, antidotis & theriacis medicaminibus accommodatum.* Aliquanto clarius eloquitur HERMANNVS cynasur. *piper hoc rotundo quidem ingratius, sed virtute potentius, & proinde ad excitandos soporosos, emendandas ventriculi cruditates, usus elegantioris est, quam piper rotundum.*

§. XIV.

De scilla, vt exponamus cur hic ponatur, superest. Hanc ob nimiam acrimoniam veteres vix audebant intus exhibere in substantia, sed aceto fere tantum infusam, aut vino vel aquæ mulsæ. Vomitus paucula grana concitant, humoresque tenaces valde incidunt & attenuant. HELMONTIO iuniori in arcanis fuit pulvis cum radice vincetoxici subactus, quem protraxit & publicis vñibus exposuit III. STAHLIVS in dispensatorio Brandenburgico nouissime edito, vbi sub titulo *pulvis scillæ compositus* legitur. Sat igitur generosus antagonista opio iunctus est, dum duobus scillæ granis, atque piperum grano vno ac dimidio stipatum ac custoditum in corpus hominis mittitur, minimeque verendum est ne narcotin magnam ipsi, hoc comitatu circumdatum, inferat: præsertim quum ex abundanti magna caterua alexipharmacorum, carminatiuorum & diureticorum subsequatur, quæ quam concinna & decora sit, nunc non quæritur. Voluit enim auctor & theriacam esse hanc compositionem, & simul alexipharmacam, non solum anodinam & sedatiuam: sed nos tantum de opiatibus volumus nunc dispicere.

§. XV.

§. XV.

Minime itaque vereor asserere, theriacam Andromachi inter anodina medicamenta, quæ a vetustate excogitata sunt, longe esse optimam compositionem, si ea spectes, quæ pertinent ad scopum sedatiuum. Tam iusta est proportio opii & corrigentium eius, vt nihil hic possit iure desiderari, nihil demi sine detrimento, nihil addi sine vitio queat. Iustam dosin si quærimus, eam determinabit quidem præsens necessitas. Si computum rite ineas theriacæ nostræ grana LXXX. vnicum opii granum complectuntur: quare sic æstimabimus quousque progredi liceat. In tenera ætate, torminum vehementiam miserabili eiulatu, aliisque signis, proden- te, proficuum sæpe cum gaudio conspexi puluerem concinnatum ex pulu. Marchion. & magnesiæ albæ a. drachm. i. theriacæ gr. x. inter se mixtis, cuius grana quinque tenerrimo data illico opem tulerunt. Enquam exigua pars grani vnius. Scilicet decem grana theriacæ octauam partem vnius grani opii continent: sed quin- que dicti pulueris grana sunt armata parte vicesima sex- ta vnius octauæ partis: quæ ducentessimam & quartam partem vnius grani æquat. Si eidem infanti eandem dosin, post aliquot dierum interuallum, præbeas, lon- ge minus sensibilem opem percipies; quin dupla quan- titas mox requiretur, vt voto satisfiat: quod & in aliis opiatis licebit simili modo conspiciere.

§. XVI.

Sed prouectior ætas, & morbi vehementissimus impetus, maiorem dosin admittunt, & sæpe expostulant; tuncque potissimum cognoscitur remedii bonitas, & quod hæc compositio a crudo opio multum differat.

C

Maio-

Maiorem dosin vocamus, quando altius adscendimus, quam ad eam quantitatem, quæ granum opii vnum comprehendit. De hoc afferam testimonia virorum doctissimorum, de sua experientia publice testantium. Primus sit celeb. OLAVS BORRICHIVS, qui in *dissert. de somn. & somnifer.* §. 32. ita scribit: *mibi nihil securius observatum in peste, quæ urbi nostræ (Hafniæ) A. MDCC LIII. ferocissime incubuit, sola theriaca, sed liberalius, non improuide tamen, propinata. Plures enecti, qui drachmam hauserant, etiam subinde drachmæ geminæ nihil afferebant opis, eoque in adultis nonnumquam ad tres ascendendum fuit, non sine periculo quidem, minus tamen, quam malum ipsum, periculoso. Viuit apud nos hodieque celebris musicus, quem tum luc illa sæuiter correptum hoc modo, propitio numine, restitui. Laudatur hoc ipsum in Eph. Ac. N. C. Cent. VI. obs. XXX. pag. 255. a celeberr. D. D. ERNDL, qui de sua experientia hæc promit: Inter omnia alexipharmaca præualebant diascordium Frac. & theriaca Andr. non ad drachmam vnā vel alteram, sed ad tres, immo vnciam semis & ultra prescripta, sale volatili C. C. præterea & camphora acuta, & cum acidulis, loco vehiculi, propinata. Numquam ausus fuisset ad tam excessiuam opiatorum dosin ascendere, nisi ab illustri quodam medico applicationem talis remedii salutarem obseruassent. Decumbebat aliquis pestilentiali febre carbunculis & bubonibus stipata, per quinque dies integros nihil dormierat, vehementissime autem, præ dolore inflammatorio, delirabat. Huic diascordii drachmas sex, theriaca dr. III. cum salis vol. C. C. dr. semis & camphoræ scrup. sem. addito aceto bezoard. & aqua conueniente, pro tribus dosibus intra sex horas assumendis propinabantur, successu tam exoptato, ut ultima dosi vix absoluta in somnum solueretur ad 7. horas, & ultra durantem, emergente simul sudore, & cessante delirio.* §. XVII.

§. XVII.

Apparet ex hoc testimonio, quod opiata correctā, etiam maiori dosi, adeo non noceant, si tempestive dentur, ut potius præclare iuvent, non profutura si timide & trepidanter fuissent oblata: & quod non omnino verum sit, quod a pluribus perhibetur, opiata excretiones prohibere, sicque confirmandis morbi viribus favere. In tractu Norico nihil celebrius est pilulis ad dystokiam b. D. D. MAVR. HOFFMANNI, quæ ex theriaca, additis cinnamomi & glycyrrhizæ pulueribus, constant. Ad harum imitationem D. PRÆSES haud ita pridem teneræ puerperæ opem tulit bolo ex iisdem confecto, quum dolores ad partum omnes superius ascenderent, ferociterque vomeret: & quamquam medicinæ partem primo oblatam illico reuomebat, alteram tamen assumptam retinebat, & vix horæ dimidio transacto geminam prolem feliciter enitebatur. Certe rationi consentaneum est vehementes spasmos maximum esse cuiusvis salutaris excretionis impedimentum: quos si quis remiserit, maximum utique attulit promouendæ excretioni subsidium & adminiculum: idque opiatis correctis & iusto tempore exhibitis licet impetrare, & in multis quidem morbis vix ullo alio citius & securius, quam theriaca; de cuius viribus plenius hoc loco differere nec institutum nostrum requirit, nec tempus permittit, quod iam diu ad alia recensenda nos vocat.

§. XVIII.

Theriaca hæc ANDROMACHI antidotus suum reformatorem & interpolatorem in Galliis nacta est IOSEPHVM QVERCETANVM, non contemnen-

dum virum, sed nimium forte sibi fidentem, & minus, quam decebat, vetera, quæ proba erant, æstimantem. Videtur abreptus fuisse illa opinione, quam alibi prodit, quod optimum medicamentum sit quodque concentratissimum, ut loquebantur illius temporis chymici, qui & panem & aquam ac vinum videntur contemnere, quia illorum beneficium, quod nobis præstant, non inclusum est paucis granis & guttulis, quæ quintam, quam somniabant, essentiam ita complectantur, ut sine excrementi necessitate illis frui liceat. Offendebat itaque virum, meras perfectiones somniantem, iamque paradysum sua chemia sperantem, humanoque generi destinantem, paullo diffusior medicamento moles, non granis sed scrupulis admetienda. Rescindebat itaque mel, quod totius quantitatis omnium assumendorum triplum requiritur: ceterorum extrahendas vires sibi fumebat, usque adeo ut & ex cineribus salia extrahenda curaret. Addebat, ne quid deesset, bono ANDROMACHO, rudioris sæculi viro, ignota, bezoar utrumque, ambram, margaritas, lapidum pretiosorum solutiones, corallia, matrem perlarum, bezoardicum minerale, cinnabarin antimonii & nativum, & plura huius generis, quæ mors atra refugit & exhorret.

§. XVIII.

Non dissimilis suæ gentis, sui nimirum temporis chymicorum, hæc inter erat, & silentio philosophico, ut par erat viro humano generi inferuituro, inolvebat menstruum illud magnum philosophicum, quo deberent a fæcibus separari & extrahi utiles partes, ut enasceretur celestis theriaca. Parum utique quantum
in

in se fuit, humano generi profuit, quum inventum suum non prodiderit absque invidia. Sed videamus quid æquitas iubeat statuere de emendatione, quam quæsuissē eum aperte intelligimus. Opium, quod basis est, retinuit, eadem quantitate, qua Andromachys posuerat. Hoc spiritu vini male extrahitur & valde imperfecte: Et quando deinceps aqueo menstruo tractatur, incommode additur spiritus vitrioli. Nolumus omnia accuratissime confectari. Hoc nemo negauerit, opium hac ratione integras vires non conservare, neque tamen vllō pacto corrigi.

§. XX.

Sed corrigentia cetera manent. Manent, sed non omnia, & integris viribus. Pulpam scillæ tertia parte minuit. Piper longum reliquit: album & nigrum omnino omisit. Nec longum, vt decebat, quale natura dedit, passus est, sed ad superciliosæ sapientiæ nutum bis vel ter recoxit, id est toties corrumpit. Bonum est, quod scillam religiosius tractavit, hocque vno meretur minus vituperari. Nolumus percurrere ceterorum, quæ addidit aut abstulit, rationes, ne nimis excrescat dissertatio. Hoc dicimus imparem fuisse **QUERCETANVM** emendandæ theriacæ Andromachi, dedisseque hunc virum pyxidem officinis splendido titulo ornatam, sed in qua nubem pro lunone amplectuntur incauti amatores, quippe nihil minus quam correctam theriacam complexa & includente: quum vere non sit in theriaca Andromachi, quod correctionem exposcat vel admittat, nisi quis *κατανοήσας* velit sigillare minutissima, & extra considerationem compositionis opiatæ posita. Sed & hoc intuitu Querceta-

nus nihil emendauit, quippe ipsius præparatum ad theriacum & alexipharmacum scopum longe minus facit, quam Andromachi antidotus, quæ cælum non affectat, sed humi reperi cum mortalibus & inter mortales, quorum vsibus destinata est, satis habuit.

§. XXI.

Theriacæ Andromachi ætate proxima est illa antidotus, quæ vocatur *Mithridatium* DAMOCRATIS. Rex ille Ponti MITHRIDATES, a quo nomen traxit, ad ætatem paulo superiorem referendus est, sed quæ sit medicamenti confectio ab hoc profecta, ignoratur: quare vtendum est illa, quam non contemnendus vir concinnatam suo iudicio, ad posteritatem transmisit. Eius libræ medicæ XII. continent opii drachmas V. adeoque tres libræ vnicam drachmam & grana xxxv. libra vna, triginta tantum quinque grana complectuntur. Sunt vero cuius opii drachmæ piperis tres, & Zingiberis duæ drachmæ oppositæ: quibus accedunt Zedoariæ vncia vna, cubearum fere tantundem, myrrhæ drachmæ vndecim, spicænardii tantundem, croci decem drachmæ, & castorei, quod singulare opii corrigens perhibetur esse, integra vncia. Nolo ceterorum carminatiuorum & alexipharmacorum recensere agmen. Satis multa, quæ pigritiem opii, excitato motu, submoueant, stertoremque interpellent, adesse apparet, vt & hæc compositio adscribenda sit melioribus & maiori iudicio excogitatis. Danda illa vel duplo largioribus esse licet, quin omnino fere triplo, quam in theriaca, sic vt duæ drachmæ non sint magna dosis, quum in tribus drachmis non amplius vno grano opii habeamus, per tot excitantia correcti. Sed & hic tenenda est cautio

tio illa, quæ in omnibus mellitis compositionibus, vt absolutæ fermentationis iustum tempus expectetur: quare semper præstat hic paullo vetustius medicamentum accepisse, quam vno anno inferius.

§. XXII.

Theriacam & mithridatium æquis partibus coniungit *theriaca de citro*, non vtique mala compositio. Scilicet singulorum duabus drachmis adduntur corticum citri conditorum vnciæ duæ, cum aliquantulo smaragdi præparati, terræ sigillatæ & specierum de gemmis frigidarum. Huius offerri potest vncia dimidia, vbicunque vel tormina alui a causa frigida compesci debent, vel nauseans ac vomituriens ventriculus sedandus est, vel grauibz temporibus ac locis aeris frigidi & humidi iniurias auertere cupimus, & transpirationem insensibilem promouere, aut fluxus alui moderari.

§. XXIII.

Progredimur ad medicamenta durioris consistentiæ, quæ opium recipiunt, a vetustate ad nos transmissa. Hæc inter primo ad se vocant *pilule de cynoglossa*, quarum antiquitas nobis patebit, legentibus ALEXANDRI TRALLIANI *libr. V. cap. de tussi*, p. m. 79. Nam quæcunque ad basin pertinent, ibi inveniuntur. Ex descriptione, quæ in dispensatorio nostro legitur, drachmæ xxxii. complectuntur opii drachmas quatuor: adeoque in vncia habemus drachmam opii vnam; vnde consequitur octo grana harum pilularum vnum opii granum complecti. Nulla re hic corrigitur opium, nisi myrrha, cuius sesquigranum ad vnum quodque granum opii additur: nisi a caryophyllis & cinnamomo tribuere aliquid velis, quorum cuiusuis ad quoduis opii gra-

granum accedit grani vnus dimidium. Ex ceteris opio conspirat semen hyoscyami. Radicem cynoglossæ etiam accensent aliqui soporiferis : sed iustas rationes habeo cur accedam THO FVLLERO in *pharmacop. extemp.* de syrupo e cynoglossa ita scribenti : *Populus medicorum vno ore vim soporiferam attribuit cynoglossæ : ipse vero hunc syrupum licet millies in usum duxi , nullam tamen eiusmodi eius virtutem adhuc obseruare potui.* Satis de reliquo bonæ sunt hæ pilulæ, si quis in catarrhalibus molestiis & alui torminosis fluxibus exhibeat pauca grana. Hodie fere pulueribus temperantibus nitrosis vnicum pro dosi granum additur, quod per interualla exhibitum conspicuis viribus sedatiuis minime caret, vt & quotidianum sit in praxi illorum, qui alias opiata reprobant.

§. XXIV.

Subiungimus his *pilulas de styrace*, quæ per Arabes ad nos transmissæ sunt. Olim, vt FRANC. ALEXANDER in *Apolline p. m. 165. b.* docet, parandis his imponebant omnia, quæ ad pilulas præcedentes requirebantur, addebantque styracem & succum glycyrrhizæ. Sed nostris officinis alio modo componendæ præscribuntur : quem in dispensatorio relegere iuuabit. Secundum hunc in vncia vna habemus paulo minus drachma vna opii, cui nihil, quo corrigatur, accedit, præter myrrham & extractum croci, quorum singulorum par opio quantitas ponitur. Parum utique, tam in his, quam præcedentibus, emendatur opii fixitas : Vnde per se non satis consulto dantur, nisi proportionata additio fiat pilularum quarundam euacuantium, vt cochiarum aut de succino Cratonis, vel aliarum scopo idonearum, quo ipso vtilissima medicina enascitur
in

in omni catarrhali & rheumatico morbo, si periti & circumspecti medici manu tempestiue offeratur.

§. XXV.

Ab iisdem Arabibus ad nos deriuatum est trochiscorum duplex genus, alterum *de balicacabo*, alterum *de Carabe, seu succino*, vtrumque opiatum. Videas ex his Arabes minus, quam Græcos, fuisse vel circumspectos in opio ordinando, vel modorum illud corrigendi gnaro, s quum vere parum ingenii ac sollertix ad eas contulerint. Prior medicina, vt apud nos paranda est, in LXXXX. drachmis duas habet opii: vnde prona est computatio, quod in vna & dimidia drachma granum vnum opii insit. Prorsus nihil est a quo excitandi vires expectes: omnia adiecta sunt lubricantia, incrassantia, refrigerantia, traumatica & balsamica. Et si quid diureticum adest, magis videtur destinatum specificandis reliquis ad vrinæ vias, quam vt opii vires nimias cohibeat. Commendabant veteres ad renum & vesicæ vitia, vrinæque dolorificam excretionem: sed parum tutam esse dosin paulo maiorem existimare licet: vt non sine ratione hi trochisci sine opio parandi expetantur: quales, si modo recentes sint, non videntur contemnendi, quum plura habeant, quæ cito corrumpi possint.

§. XXVI.

Trochiscis *de Carabe* exigua vel nulla prærogatiua tribui potest. Drachmis XXXII. quatuor scrupuli insunt opii crudi: adeoque vncia vna habet eius scrupulum, & XXIV. granis vnum opii prorsus crudi, nisi quantum croci par quantitas emollire possit, inest. Cetera sunt incrassantia & adstringentia, præter succinum, quod excretionem aliquantulum stimulat. Hæmorrhagius

giis sistendis satis efficaciter, vtinam aque tuto, succurrunt, cum succo plantaginis exhibiti. Sed fere in hunc finem dare placebat *looch de portulaca*, in cuius duabus fere libris vnica horum trochiscorum drachma est, id est granum sestertium: cuius quantitas satis magna lingi lambique potest, ante quam in periculum ægrotus adducatur.

§. XXVII.

Inter vetustas compositiones vnica superest, nempe *Collyrium album*, quod barbaro nomine *sief* notius est. Tribus eius vnciis inest drachma opii vnica, vnde in vncia erunt XX. grana, in drachma nondum tria grana. Externis tantum vsibus destinata est medicina, in ophthalmia, lacte muliebri aut aqua quadam diluenda vt instillari possit. Apparet quam pauxillo ad hunc finem opus aut locus sit. Sed iam antiqui reprehenderunt opium hoc casu, teste DIOSCORIDE *Lib. IV. Cap. LXV. Erasistratus*, inquit, *Diagoram testatur illius usum damnassee in aurium doloribus & oculorum lippitudinibus, quoniam & visus aciem hebetaret & soporiferum esset. Addidis Andreas, protinus excoecatum iri, qui eo ilinerentur, nisi adulteraretur.* Non quæremus nunc, annon nimius sit metus; quoniam rarius hodie expetitur hæc medicina, & pro illis, qui cauti esse volunt, sine opio præparatum collyrium prostat. Progredimur potius ad medicinas opiatas, quas recentius æuum excogitauit & ad nos transmisit.

§. XXVIII.

Initium facimus ab *electuario de ovo Imperatoris MAXIMILIANI*. Illius dimidiam partem facit theriaca *Andromachi*. Adduntur alexipharmaca & antidysenterici-

terica, cum croco & nuce vomica. Hæc vero vltima tam exiguo pondere accedit, vt ad drachmas LXXII, vnica tantum ponatur. Apparet hoc electuarium censi debere a theriacæ viribus, & si opium spectes, duplam, respectu illius, quantitatem præberi posse, & ne irrita spes reddatur, debere. Corruptum medicamentum, qui nucem vomicam subtractam volunt; cuius potissimum intuitu iuuat ab animali rabido morsos, & in periculo hydrophobiæ versantes. Cum hoc in multis conuenit *electuarium camphoratum*: quod in pari quantitate duplum nucis vomicæ complectitur. Vtrumque remedium in pestilentia, cum aceti bona quantitate exhibitum, maxime conspicuos fructus sæpe edidit, si proportionata vehementiæ morbi dosis oblata fuit.

§. XXIX.

Electuarium Oruietanum vix inter opiata meretur referri. Inter CCXXVI. vncias sunt theriacæ Andromachi sex vnciæ, vnde computo instituto apparet quatuor drachmas sex forte grana theriacæ complecti. De reliqua æconomia medicinæ huius nunc non vacat dispicere. HELMONTII iudicium in *aurora medicinæ* legere iuuabit, editionis Germanicæ, quæ omnium optima est, pag. 659. *Electuarium diascordium* FRACASTORII in vnciiis LVI. & sex drachmis, inclusa gerit opii XC. grana: ex quo conficitur, tres electuarii nostri drachmas cum dimidia, vnum opii granum fouere. Habet autem, pro qualicunque correctorio, piper, Zingiber, cassiam ac cinnamomum, præter adiecta alexipharmaca. Ipse auctor salutem non alia conditione promittit in morbis contagiosis, quam si cum magno

vehiculo ex succo citri, trifolii acetosi & aceti, adsumatur. SYDENHAMVS commendat, sed ea quantitate datum, quæ mensuram potius quam titulum remedii impleat. Eius, ut puto, discipulus, certe epitomator, PECHEY, plerumque sex drachmas præbet, quæ dosi non nimia est illis casibus, ubi maiorem usus & necessitas requirunt.

§. XXX.

In hoc diascordio displicebat viro magno, FRANC. de le BOE SYLVIO, excessiua quantitas sacchari cum conferua rosarum adhibiti, & mellis seorsim adiiciendi pro electuarii consistentia: quare his omnibus abiectis concinniore medicinam fecit, quæ vegetabilium alexipharmacorum vires, per spiritum vini extractas & radice imperatoriæ, cum aromatibus quibusdam, in forma pulueris adiectis, massam quandam pilulis idoneam sistit. Non promptum est indicare quantitatem quæ opii granum vnum foueat: æstimare tamen licet in drachmis XLVIII. duas drachmas opii contineri: adeoque diascordii Syluiani vnam drachmam opii duo grana cum dimidio fouere. Videatur ipsemet auctor *prax. med. lib. I. Cap. LVIII. §. 22.* Dosi præscribit grana XV. vel XX.

§. XXXI.

Ex magna variorum ingredientium farragine composita est *antidotus* MATTHIOLI, quam secundum præscriptum pharmacopoeæ Augustanæ parare iubentur officinæ nostræ, si alicubi usus eius forte supersit. Cum cælesti theriaca QVERCETANI certare potest ingredientium varietate, quæ in illa dinumerabilis est, in hac ad calculum vix reuocatur, cum amplissimas compositiones, theriacam ac mithridatium, recipiat, insuperque

que quinque sic dictas species, id est pulueres officinales valde compositos, atque duo trochiscorum genera, haud certe simplicia. Sat amplo otio abundet, qui singula enarrare & eorum pondera ad calculum reuocare velit. Non læsero officium mortuis debitum, si dixerō MATTHIOLVM operæ pretium non fecisse suo studio. Drachmæ eius cīo ioc LVI. habent opii grana XC. quæ totidem doses ponemus. Ad sunt theriacæ sex vnciæ, quas adsumemus doses esse XLVIII. mithridatii autem parem quantitatem doses XXIV. æstimabimus: conficitur, vt tota quantitas doses CLXII. contineat. Atque adeo vltra vnciam liceret in assumendo progredi, ad decem drachmas, nisi confusanea reliqua farrago plerorumque calidorum nos contineret. Ipse auctor drachmam vnam, ad summum tres, dare præcipit *Comment. in Dioscorid. lib. VI. p. m. 980.*

§. XXXII.

Vt in præcedenti pater theriaca & mater mithridatium simul ambulant, sic in *Electuario contra pestem* secum ducunt, tamquam telephorum filiolum, diascordium puta Fracastorii. Cur pari quantitate molis posita sint, quæ virium quantitate imparia sunt, causam vix aliam inuenies, præter illam, quam iocati indicauimus. In vniuersum vix octo doses sunt. Sed quid iuuat immorari infelicis ingenii inuenusto partui, ætatem vix laturo? Progredimur ad alia.

§. XXXIII.

Inter pilulas nouas obueniunt, quæ maiori ingenio confectarum nomen vtique merentur, *Starkeyanæ*, ab inuentore D. GEORGIO STARCKEY, Anglo nomen adeptæ. Non laudaturi sunt eas, qui remedii bo-

nitatem ex formulæ longitudine metiri solent. Opii pars vna cum duabus pulueris ellebori albi iungitur: permiscuntur ambo sapone quodam chemico, ex oleo terebinthinæ optimo & sale tartari, magno & patienti studio conficiendo: cuius duplum ad opii & ellebori pondus, debet in massam recipi. MATTHAÏVS quidam empiricus elleborum nigrum addidit & glycyrrhizæ puluerem: BOYLAEVS insuper etiam crocum. Ratio totius medicamenti est, quod opii nimia vis excitatur per elleborum adiectum, vt in theriaca per scillam & piper, in Philonio Romano per euphorbium. Corrector ille tam opium, quam elleborum, eneruat, proprie loquendo nil corrigit. Nimis & intempestive oblatus diuresin valde exstimulat, & gonorrhoeam facit. Plura cupiens adeat STARCKEYI chemiam, BOERHAAVII *elem. chem. P. II. proc. 74.* adde editionem spuriam *process. 67.*

§. XXXIV.

Succedunt *pilule Wildegansianæ*, quorum maius est ingenium, quam a lanarum carptore, hinc cinisflone facto & in empiricum euecto, expectare licebat. Sed incidunt in talium hominum manus subinde aliqua, quæ deinde sibi vindicant. Basin hic facit opium, quod corrigitur auro fulminante & sulphure antimonii aurato, tamquam emeticis, quibus aloes, myrrhae crocique parum succenturiantur. Perquam multas esse descriptiones scio: sed vix meliorem vidi illa, quæ in nostro dispensatorio legitur. Sunt autem tam Starckeyanæ, quam Wildegansianæ, admodum parce dandæ: sæpiusque vidi dimidium granum priorum (nam Wildegansianis ad hunc modum paratis nunquam vsus sum) pulveri-

veri-

veribus temperantibus & nitrosis mixtum, satis spei ac voto fecisse. Mihi, vt verum fatear, in vtrisque displicet, quod nimis exigua quantitas doseos in corpus delata totas vires simul ac semel in ventriculo exserit: semperque melius ac tutius esse vidi, si quis ad harum imitationem purgantia & anodina rite iuncta extractis gummosisque misceat, sic enim sensim resoluta & ad plures interaneorum partes successiue delat, ablandiorem & securiorem efficaciam exserunt. Nec puto purgantia fortissima requiri, quæ vix satis ubique tuta sunt, sed ialappæ scammoniiue resinas cum pinea tritas, opii connubio idoneas inueni. Quin noui excellentem, practicum, qui in mitiori casu extracta rhabarbari & croci mixta, in molestiis catarrhalibus, adhibet, fructu spei abunde satisfaciente.

§. XXXV.

Reliqua officinarum opiata strictius recensebo. *Trochisci de succo liquiritiæ* correcto in XVII. unciiis habent opii citrati tres drachmas. Unica igitur drachma granum opii continet. Florum sulphuris magna portio adiecta facit ut satis bonum sint remedium in tussi & aliis catarrhalibus affectibus, sed sufficit scrupulum dimidium præbuisse. *Electuarium antifebrile* in quatuor drachmis paulo amplius vno opii grano complectitur: sed ob alia adiecta minus placet. *Morsuli contra pestem* in duabus libris, & septem fere vnciiis, habent theriacae quatuor drachmas: magnam quantitatem sane deuorare deberet, qui inde noxam vellet metuere. *Pulvis anodinus confortans* est valde opiatus: fouet in septem granis vnum extracti opii: quare admodum caute erit dandus. *Pulvis contra palpitationem cordis* in XV. scrupulis habet theria-

riacæ cælestis scrupulum dimidium & laudani opiati grana quinque: in priori iustas doses tres, in posteriori duas esse ponemus, tales scilicet, quas non facile attingimus aut superamus: apparet igitur scrupulum vnum esse dosin mediocrem.

§. XXXVI.

Laudanum opiatum ad extracti opii duas vncias adiicit extracti croci quartam partem, additque puluerum, a quibus opium non corrigitur, quinque drachmas & odoramentorum drachmam dimidiam. Habemus itaque in grano vnico paulo minus duabus tertiis opii fere crudi. Nihil præclari est in hac medicina. In *laudano hysterico* omittuntur odores, accedit autem extractum castorei. *Laudani prinaryi* scrupulus dimidius, laudani ordinarij granum vnum fouet. *Laudanum liquidum Sydenhami* ad duas vncias opii, croci vnam recipit. Vini Hispanici optimi libra 1. ad extrahendum & soluendum adhibetur. Includit igitur drachma vna, quantum ex decem opii granis solubile fuit. Apparet decem huius laudani guttas vt plurimum sufficere, raroque altius ascendendum, sæpe infra has subsistendum esse: quas aquis ad scopum idoneis diluere, & partitim præbere iuuabit, quo minus periclitabimur.

§. XXXVII.

Inter *essentias* reperio *theriacalem*, quæ paratur ex theriacæ vncia vna, cui affunditur sp. vini libra dimidia. Eius itaque drachmæ duæ tantum virium opiatæ medicinæ fouent, quantum expectari potest a scrupulo vno theriacæ Andromachi. Porro *anodinam ex laudano*. Vncia vnica possidet tantum opii, quantum inest drachmæ laudani vni, id est fere duos scrupulos. Ultra guttas X.

non

non licebit multum progredi Consultius est sequi modum D. D. Ludovici, qui, sumtum notabili compendio, parat ex opio crudo, cuius vnciæ vni affundit mentisfrui vncias octo. Erit itaque in vncia vna, quantum a drachma opii proficisci potest. Guttæ decem aut XII. sufficiunt. *Essentia pectoralis s. asthmatica Anglicæ*, admodum parum de opio habet. In LXXII. drachmis, quæ sufficienti spiritus quantitate infundendæ sunt, habemus opii duas: si ponamus quadruplum spiritus affundi, quæ minima erit quantitas, vnciæ XXXVI. parabuntur, quarum quævis nondum integra duo opii grana comprehendet. Haud ita magnam dosin dederit qui dimidiam obtulerit: præsertim si amplius, quam nos in calculo supposuimus, diluta fuerit. *Tinctura opii D. CRAANII* proxime accedit ad *Essent. anodinam LVDOVICI*, paremque in dando modum postulat.

§. XXXVII.

Superfunt duo medicamenta, quæ magnifico *elixirii* nomine superbiunt Horum primum *pestilentielle*, ad CROLLIVM auctorem pertinet. Est essentia theriacæ, balsamo sulphuris combinata. Nihil virium ab opio, quod in theriaca fuit, expectari potest in tam exigua dosi quam auctor præscribit, quæ a pauculis guttulis ad scrupulum vnum ascendit: & hanc superare, ob caliditatem ceterorum, non consultum est. *Elixir præservativum contra pestem*, si cetera spem implent, ob opii accessionem metui non debet, cum integra libra eius non plus mithridatii admittat, quam quantum semel impune licet assumere.

E §. XXXVIII.

§. XXXVIII.

Denique etiam dispiciendum erit de destillatis quibusdam, quorum materiam opiatæ medicinæ ingressæ fuerunt. Occurrunt autem *aqua theriacalis simplex & composita*: atque ex his porro præparantur alia. *Simplex*, ad dispensatorii nostri præscriptum accurate parata, in vncia vna tantum habet, quantum a drachma vna theriacæ Andromachi accipere potuit: mereturque potius dici spiritus. Sed *Spiritus theriacalis* nomen tribuitur alii destillato, cuius tres drachmæ continent quicquid spiritus ex theriacæ granis LXXXI. trans alembicum vehere potuit: insimulque myrrhæ & croci viribus imbutum est. *Aqua theriacalis composita*, præter vegetabilia complura, recipit theriacæ Andr. tres vncias & mithridatii vnam; quibus vinum Rhenanum & succi vegetabilium quidam, cum aceto bezoardico, infunduntur, quæ vniuersa quantitas facit libras duodecim. Si ponamus pharmacopoeum destillando euocare partem tertiam, quatuor libras; binæ vtique prolekti liquoris vnciæ complectentur, quantum theriacæ drachma vna, & mithridatii scrupulus vnus, largiri potuerunt.

§. XXXVIII.

Mixturam simplicem nostræ officinæ, secundum normam sibi præscriptam, parant ex spiritus theriacalis camphorati vnciis V. spiritus tartari duabus, & spir. vitrioli vna vncia. Habet itaque vncia huius mixturæ drachmas quinque sp. theriacalis, duas spiritus tartari, vnam spiritus vitrioli. Si itaque theriacæ gr. LXXX. vnicum granum opii continent (§. XV); & spir. theriacalis tres drach-

drachmæ theriacæ granis LXXV. respondent (§. XXXVIII.): in his quinque drachmis nondum est quod duabus dosibus theriacæ par sit, de opio. Eadem quantitas grana camphoræ sex, ex præscripta lege, fouet, & forte amplius quartam grani partem. Sed vereor, ne maior pars camphoræ, admixto spiritu tartari & vitrioli, ad fundum præcipitetur, & valde parum, vixque memorabile supersit. Nescio igitur quid sibi velint, qui vel suspectum reddunt medicamentum, modo de opio modo de camphora mussitantes: vel simplicitatem, quam laudare debebant, ipsi obiiciunt. Equidem omnibus tincturis bezoardicis & essentiis alexipharmacis longissime præferendam eam esse expertus assero.

§. XXXX.

Tinctura bezoardica, est mixtura simplex composita & prodige opiata. Tres drachmæ cum dimidia continent decem grana opii. Ex quo fit, vt propter opii nimiam quantitatem, quæ dosin ad paucas guttas restringit, ceterorum vires proportionato modo non possint adplicari ægroto. Sed hoc dictum sit de ea, quæ ad præscriptum nostri dispensatorii paratur: nam melior & innocentior est, & parum a Mixtura simplici diuersa ea, quæ iuxta pharmacopœam Augustanam parata alibi in vsu est, & cum emolumento quotidie datur. Nostræ oeconomiam propius intueri oportet. Paratur spiritus bezoardicus, cuius duæ libræ continent quicquid integra libra theriacæ destillato communicare potest. Huic spiritui permiscetur cetera, & inter hæc opii duarum vnciarum pondus. Iam totum medica-

E. 2

mentum vncias XLII. conficit: sequitur, vt in vna drachma habeamus, quantum theriacæ drachma dimidia destillando emittit, & insuper opii integri, tantum dissoluti, duo grana cum dimidio.

§. XXXXI.

Aqua vitæ contra pestem, potius essentia dilutior theriacalis & alexipharmaca, in libris XXV. vncias tres theriacæ Andromachi complectitur. Libra itaque integra tantum possidet ab opio, quantum a theriacæ drachma vna capere potuit. Eiusdem census est *spiritus febrifugus & diaphoreticus*, cuius libræ XVII. opii drachmas quatuor habent: ex quo cognoscitur vnciam integram huius abusive dicti spiritus granum opii vnicum, cum exigui momentuli excessu, continere. Quam fortiter ille aduersus pestem, hic aduersus febres, pugnaturus sit, hic non exquirere vacat: sufficit opiatas vires indagasse, quæ longe vtrique maiores sunt in posteriore, in priorē vix memoratu dignæ.

§. XXXXII.

Spero me dixisse de omnibus opiatīs compositis ad vsum internum destinatis, & in nostrarum terrarum officinis prostantibus. Superest vt dispiciamus de illis, quæ vñsibus externis destinata sunt. Occurrit primo *Sotivella parua*, id est massa quædam dolentis caui dentis cauernulæ indenda. Fere quarta parte constat ex opio, adeoque narcotico effectū non carebit. Succedit *aqua odontalgica*, quæ in sesquilibra comprehendit tantum opiatarum virium, quantum ad XXXVI. doses introsumendas sufficit: adeoque vncia dimidia ori fouendo & colluendo erit tuta quantitas. *Vnguentum somniferum* in quinque vnciis habet opii drachmam vnā: adeoque in

in vncīa dimidia grana sex opīi continet. Longe minus, & vix vt reuocari ad calculum possit, opiatum est *unguentum comitisse*, cuius libris forte quatuor, vel quinque, duo admodum scrupuli accedunt opīi, quod in trochiscis de Carabe continetur: vnde parum vel sperandum ab illo, vel metuendum, videri possit.

§. XXXXIII.

Emplastrā opiatā sunt *catarrhale*, quod in tribus vnciis duas drachmas opīi fouet: ex quo consequitur quemuis scrupulum paulo minus duobus granis fouere: quam quantitatem puto sufficere inducendo emplastro in ordinariis casibus, vbi ad tempora imponi solet. *Carmīnatiuum Sylvii*, in tribus vnciis fouet drachmam opīi: de bonitate eius & vsu ipse nos edocet *praxeos libr. 1. cap. XIV. §. 58.* quibus nihil vel addere vel obicere audeo, quum mihi experientia, quam adducit, sacrosancta sit. *Emplastrum pro temporibus* in vnciis XXX. habet tres opīi. Decima igitur parte sua est merum opium. Existimo autem parum eius poros cutis posse subire, quum tenacibus resinis, quæ maximam emplastri partem constituunt, inuiscetur & quasi irretitum sit. Quantitas exigua, quæ imponitur, etiam hic, vt in catarrhali, facit, vt non magnopere extimescendus sit vsus: cui experientia quotidiana adstipulatur, quæ multa exempla vsus optatissimi offert. Memini casus, vbi ab imposito hoc acerrima materia & cutim, super quam defluerant guttæ, erodens, euocata, omnem dolorem dentium hemicranoden feliciter abstulit, quum tot alia præsidia in vanum & cassum fuissent adhibita. Atque hæc nunc

S V F F I C I A N T.

NO-

NOBILISSIMO AC DOCTISSIMO
DOMINO CANDIDATO

S. P. D.

P R A E S E S.

Qui ad medicinam faciendam accedunt, ante omnia curare debent, ut eorum, quae praescripturi sunt agrotis fidei ipsorum commissis, habeant accuratam cognitionem. Admodum multa sunt, quae antiquitas nobis commendauit, tam simplicia medicamenta, quam ex his preparata & composita. Optandum utique esset, ut quae eodem nomine gaudent, eodem modo se per uniuersum orbem haberent, nemoque auderet quicquam in illis loco mouere. Fatendum tamen est, rem non ita habere, sed multum discrepare libros, qui pharmacopoeis norma loco dati sunt, eoque fieri ut diuersis locis diuersarum virium medicamenta eodem nomine veniant. Incredibilem haec res facit molestiam & magnorum saepe errorum occasiones praebet. Nam siue quis practitorum libros legit & laudes medicamentorum notauit; si alio loco utatur non eodem modo paratis, non habere utique eandem successum res potest: siue alibi centies uno medicamento
usus,

usus, & certos effectus consequutus est; si alibi idem cum optima circumspectione tentare velit, sine suo excidet aut damno illato ingemiscet. Sed huic calamitati una medela est, assiduum studium pernoscenti dispensatoria & pharmacopoeas diuersorum locorum, atque illa sedulitas, ut omnia rite comparemus cum illius officina, ad quam praescriptiones dirigendae sunt, perspectis rationibus. Prater cetera autem hanc cautionem adhibere oportet in duobus medicamentorum generibus, quibus excretiones prouocamus, & quibus motibus nimis concitatis modum ponere cupimus. Et quamquam in utroque genere magnum ab abusu & errore periculum imminet: haud tamen scio annon maius sit a posteriori medicamentorum classe metuendum. Opera itaque pretium fecisse mihi videris, qui hoc medicinarum genus ad examen reuocasti, virium rationes ponderasti & usum indicauisti. Gratulor laborem bene per actum, & curriculum academicae vitae cum laude absolutum, utque honoribus, quos prope diem consequeris, feliciter diuque fruaris, patriaeque tuae plurimo cum fructu inseruias, animo TIBI optime cupiente, voueo & apprecor. Vale. Hala Magdeburgica a. d. xviii. Maii cId Iccc xxxv.

Freund

S Reund, der auf Schulen schon mein treuer
 Damon war,
 Ich liefre Dir entzückt die reinsten Wünsche dar:
 Denn Meditrine will mit zärtlichen Empfinden,
 Den edlen Lorber-Schmuck um Deine Schläfe winden.
 Nun siehst Du, was der Fleiß vor schönen Nutzen
 bringt
 Und wie man durch Verdienst dem Ruhm entgegen
 dringt.
 Du solst nach flugen Ernst und suchenden Verlangen
 Der Weisheit ersten Lohn den Doctor-Hut empfangen;
 Der Himmel stehe Dir in Deinen Curen bey;
 Damit Dein Lob und Glück frisch, herrlich wach-
 send sey.
 Ich dancke Deiner Gunst aus unverfälschtem Triebe;
 Entzeuch mir nie Dein Herz, vergiß nicht unsre Liebe.

So wollte dem Herrn Doctorando als
 seinem hochgeschätzten Freunde, zur wohl-
 verdienten Doctor-Würde aufrichtig
 Glück wünschen und sich dessen bestän-
 digen Liebe und Gewogenheit empfehlen.

George Friederich Cruger.

S. S. Theol. Studiosus
 Crosn. Siles.